

甲午年端午祭文

古水

甲午年五月初五 / 2014-06-02

闕逢敦牂之歲，望阜初五，南昌漢服社具以香燭果醕，公祭故楚三閭大夫屈子于豫章。先是，宗兄翔龍屬余作文饗之，詞曰：

君子行不貴苟難，苟之教也；既明且哲，以葆其身，詩之誨也；而屈子之名，垂流今古，何也？蓋以清操皜然，蟬蛻于淖泥，較之舖糟餽醢輩，可謂察察其身；用而被誅，諫而受紉，猶復進憂國事，放思廟堂，富有君子之德；至於途窮無奈，全節死義，又安非文山、靈首之先範哉？故世之君子，或乘桴浮海，或採薇首陽，或蹈海沉河，或臥薪蟄伏，曷得一以論也！

屈子之愛美，甚矣，其情信芳，其質孔昭，辭遂高潔，文約旨遠，太史公以爲與日月爭光可也。屈子既沒，雖有長于辭賦者，亦徒仰企大夫，況乎余等後學，薤露悼詞，不足一哂。

於戲！清烈之去，數千年矣，而後人感懷；如今天下燕安，秦楚一家，無患鋒鏑之懼，無虞饑饉之災，宗廟未疎，后祀不蕪，舉賢授能，脩明法度，美政行于世，大夫可安矣。

尙饗！